

K
31252/A

L XII. Ate



10



Trilobites



Trilobites



Trilobites

Trilobites

Trilobites

Trilobites

Trilobites

Trilobites



Trilobites



Trilobites

A



*Fructus Areccæ ab
involuero separatus.*

E

*Fructus Stry Boa dictus
adhuc integer.*

C



*Fructus Areccæ, in
feriorem partem
ostendens.*

G

*Semina Stry Boa e locularientis
exemta.*

G

D



*Fructus Areccæ
in medio dissectus.*


F

Fructus Stry Boa in medio dissectus

B



*Fructus Areccæ,
partem superiorem
representans.*



Q. D. B. V.

DISSERTATIO INAUGVRALIS MEDICA
DE

ARECCA
INDORVM

QVAM

IVSSV ET AVCTORITATE

INCLVTI MEDICORVM ORDINIS
PRO LICENTIA

SVMMOS IN MEDICINA HONORES
LEGITIME CAPESSENDI

EXAMINI PVBLICO SVBMITTIT

A. D. XI AVGVST. A. O. R. CIOIDCCCXXXIX

AVCTOR

ANDREAS IACOBVS KIRSTEN

ALTORFINVS

PHYSICVS GRAEFENBERGENS. DESIGN.

ALTORFII NORIC.

TYPIS IOH. GEORGII MEYERI ACAD. TYPOGR.





PRAEFATIO.



Aud exigui momenti sunt illa , quae
 SENECA, *laudatissimus inter omnes*
ueteres Scriptor , in epistola CIIII, de
peregrinatione differit : Inter studia
uersandum est, inquit , et inter aucto-
res sapientiae , ut quaesita discamus , nondum inuenta
quaeramus. Sic eximendus est animus ex miserrima
seruitute in libertatem. Digna uidentur haec uerba,
quae omnibus , qui studiis operam nauant , et inprimis
medicinam facere constituunt , quotidie ante oculos
uersentur , diligenterque considerentur. Quam multa
enim in regnis naturae occurrunt occulta , quae nesci-
mus ! et quam uaria quidem in iis detecta inueniun-
tur , quorum uero facultates nemo adhuc peruestigauit !
Producam specimen huius ueritatis e regno uegetabili.
Quod etsi multa secura et satis cognita remedia nobis
in solatium miserrimae nostrae uitae exhibeat ; attamen
nec pauca adhuc , quae maxime ad usum et facultatem
plantarum pertinent , abscondita gremio suo complectitur.
Itaque omnino operae pretium facturi uidentur
cultores artis salutaris , si in cognoscendis , discernen-

*cernendisque plantis sequantur ductum peritissimorum in studio Phytologico uirorum, RIVINORVM, HERMAN-
NORVM, TOVRNEFORTIORVM, RAIORVM, LIN-
NAEORVMQVE; utpote qui in plantis in ordinem re-
digendis, earumque charactere determinando, accura-
tissime felicissimeque elaborarunt, ita, ut summas pro
tantis laboribus iis debeamus gratias. Non minus ta-
men antiquorum etiam medicorum scripta bene atten-
teque sunt euoluenda; propterea, quod hi non quidem
in inueniendis notis characteristicis, magis tamen in e-
ruendis plantarum uirtutibus, occupati fuerunt. Verum
quidem est, non exiguam praestantissimorum ex regno
uegetabili desumptorum remediorum, quibus usa est
antiquior aetas, temporis tractu, aut nescio quo fato,
parum aestimari, et fere prorsus exoleuisse: attamen
quaedam ex his, successu temporis, nouam quasi lucem
aspexerunt, auspicatoque in usum sunt uocata. Idem
fere fatum Arecca passa est, cuius uirtutes miris no-
minibus ab antiquis Medicis sunt praedicatae; a re-
centioribus uero, perpauco si exceperis, usus eius ne-
glectus et parui factus est. Igitur consultum putauit,
post decursum studiorum meorum academicorum, in
hac inaugurali dissertatione Areccam quasi postliminio
in scenam producere, et pro uirium mearum conditio-
ne, Palmae istius arecciferae foetum, eiusque uirtutes
medicamentosas, et quae sunt alia, rite explicare.*

*Faxit Numen diuinum, ut hic labor bene felici-
terque eueniat!*

§. I.

DVm itaque de *Arecca* nonnihil commentari constitui, ^{Propositi ratio.} primum me ad nominis, deinde ad rei ipsius, considerationem, accingam, quicquid humeri hic ualeant, uiresque permittant, periclitaturus.

§. II.

Quod adeo ad *Etymologiam* attinet; facile quidem sibi ^{De Etymologia nominis Areccae.} quis persuadere posset, (qui Graecos nomenclatores euoluerit), fructum *Areccam* forte nomen suum a Graeco uocabulo *ἀρακος*, uel *ἀρακίς*, accepisse. Cum autem hae uoces Graecae, non arboris fructum; sed plantam aliquam ex leguminum genere significant, ipsique auctores, GALENVS ^{a)} nempe, et THEOPHRASTVS ERESIVS, ^{b)} (qui primi de hac planta mentionem fecerunt) nil aliud, quam leguminis speciem sub hoc nomine intellexerint; patet inde, *Areccae* nomen minime a uoce Graeca *ἀρακος* ortum suum sumpsisse; multoque mihi ueri similis est, id uocabulum barbarum esse. Qua de causa nec mihi displicet GARCIAE ab HORTO ^{c)} sententia; utpote qui tradit, fructum *Areccam* nomen suum accepisse a regione quadam Indiae huius nominis; quo nomine inprimis Nobiliores Malabariae, nec non Lusitani, in Indiis habitantes, utuntur; a uulgo autem *Pac* uocatur.

§. III.

Nonnulli quidem fuere, qui sub nomine *Arecca* uarias ^{De Homonymia nominis Areccae.} species fructuum intellexerint: siquidem CHRISTOPHORVS A COSTA, ^{d)} et, qui hunc secutus est, PETRVS POMET, ^{e)} dum in describendis *Myrobolanorum* generibus occupati fuere,

A 3

Che-

^{a)} Libr. I. de aliment. facultat. Cap. 17. ^{b)} Hist. Plantar. Libr. 8. Cap. 8.

^{c)} Libr. I. Arom. ex edit. CAROL. CLVS. p. m. 104. ^{d)} Libr. Arom.

p. m. 265. ^{e)} Histoire des Drogues, Chap. 36.

Chepulorum genus, *Aretcam*, siue *Arecam*, uocarunt. Alii, ut IACOBVS GOHLIVS, f) sub nomine *Arec*, designauit arborem aliquam, in India Orientis quidem nascentem, sed spinosam, fructusque Ciceris magnitudine, colore rubescente, ferentem. Alia etiam arbor, in *Horto Malabarico*, g) sub nomine *Areca-Goli* describitur depingiturque, quae autem minime ad familiam nostrae *Areccae* pertinet, sed ab ipsis auctoribus huius libri, *Ficum Malabaricarum* classi annumeratur. Quod autem ex antea enarratis hisce arboribus, ne unica quidem cum nostra arbore *Areccifera* conueniat, haecque minime ex illarum genere sit, latius infra ostendam. Sunt etiam, qui potum aliquem, Indis valde familiarem, *Arek* uocarunt; quem Indi ex liquore *Suri*, exstillante ex *Palma* quadam *Coccifera*, per fermentationem, uino nostro adusto haud absumilem, (quod quidem ad colorem et saporem attinet,) parare sciunt. Qui potus uero male *Arek*; sed, sicuti CASPARVS BAVHINVS h) annotauit, melius *Arak* dicitur.

§. IV.

Quibus aliis
nominibus
Arecca de-
signetur?

Aperiretur mihi quidem nunc patentissimus campus, in quem exspatiari possem, si uellem singularum Orientis gentium, singula nomina, quibus *Areccam* designare solent, recitare. Quia autem officii mei ratio hoc non postulat; iam duntaxat usitatiora nomina, quae ex auctoribus annotare potui, breuiter exponam. Qui plura desiderat, et his delectatur, eum dimitto ad CHRISTIAN. MENTZELIVM, solertissimum quondam Botanicum, qui in colligendis synonymis plantarum uocabulis multum studii collocauit. Initium ergo faciam a Lusitanorum voce; quia Lusitani ex primis fuere, qui fructum hunc sub nomine *Arecca* in Europam apportarunt. Ab his uocatur *Arecquero* i); a Gallis autem *Arec* k); ab

f) *Lexic. Arabico-latin.* p. 76. g) *Part. I. pag. 45.* h) *Theatr. Botan. Libr. XII. Sect. VI. pag. 509.* i) *DAPPERI descript. Asiae, p. m. 4.* k) *Histoire de l'Academie de Science de Paris, Anno 1720. p. 442.*

ab Anglis uero, teste IACOB. THEODORO TABERNAMONTANO l) *Drunken Date tree*; et a Belgis, *Arecca Nooten*. Orientis gentes, ut Malayi, fructum hunc, sicuti §. II. annotauimus, *Areccam* et *Pak*, salutant. Malacenses, nec non Iauani, illum *Pinan*, m) uel *Pynang*, appellant. Arabes denique, utpote qui primi de usu huius fructus in medicina, passim in suis scriptis mentionem fecerunt, *Faufel*, uel *Foulsel*, illum nominarunt. Quo uocabulo AVICENNA n) etiam, et SERAPIO o), utuntur; quamuis apud priorem in uersione Latina corrupte *Fielsel* et *Fufel* legatur. Quidam *Areccam*, uti PETR. ANDR. MATTHIOLVS p), solo nomine Auellanae Indicae designarunt. Quod autem hic Auctor nec *Areccam* recte cognouerit, in eiusque descriptione grauissime errauerit, satis iam IOH. BAVHINVS q) monstrauit. In nostra uernacula lingua, fructus hic *Arecca Nuß*, et a quibusdam, ut a SAMVELE DAHLE r), et ROBERTO KNOKS s) (licet male) *Indiansche Nuß*, uel *Betel-Nuß*, uocatur.

§. V.

Sufficiant haec de *Arecae* denominatione. Iam quod ad Descriptionem eius descriptionem attinet, mihi *Arecca* dicitur, Arboris Indicae Orientalis, *Palmae Arecciferae* dictae, fructus. Nuci moschatae maiori magnitudine similis, non tamen oblongae et rotundae, sed magis conicae figurae, in inferiori parte sessilis, durioris consistentiae, extrinsecus cinereo, aut subfusco colore, tenuibusque rugis; intus uero uersicolore uenarum discursu signatus, odoris plane expers, saporis uero paululum amaricantis, et adstringentis, inclusus inuolucro uilloso eique ouali et exterius subflauo. Quia uero ipsemet
Descriptio
fructus
Arecae.

B huius-

l) *Herbar. Cura* CASP. BAVH. edit. p. 646. m) *GARZ. AB HORT. L. I. arom.* p. m. 104. n) *Lib. II. Cap. 262.* o) *Libr. Simplic. Cap. 345.* p) *Herbar. Cura* CAMERAR. edit. pag. 100. q) *Hist. plant. Lib. III. p. 390.* r) *Pharmacolog. Part. II. p. 347.* s) *Beschreibung der Insel Zeilan. pag. 25.*

huiusmodi fructum possideo, eius formam et interiorem et exterioram, in tabula aenea, nostrae dissertationi adiecta, delineandam curavi, quam lector beneuolus facile oculis suis subiicere potest.

§. VI.

Arecca est
fructus Pal-
mae Arecc-
ciferae.

Diximus in hac descriptione, *Areccam* fructum esse arboris Indiae Orientis, quae *Palma areccifera* dicatur. Rem uero omnino ita se habere, hanc arborem etiam ueteribus scriptoribus, in scientia Botanica, sub Palmae specie cognitam fuisse, ex horum descriptione satis clare patet. Id quod testantur uerba ipsius THEOPHRASTI ERESII, *t*) ubi de uariis Palmae generibus mentionem facit: Ἐτερον δὲ, ἔ τὸ φύλλον τὴν μὲν μορφήν πτέρυγες, τοῖς τῶν σπουδῶν πτεροῖς ὅμοιον ἃ παραλίθεται παρὰ τὰ κέρατα, μήκος δὲ ὡς διπηχᾶν. i. e. *alia, cui folium praelongum, simile pennis struthionum: quae super galeis imponuntur, longitudine duorum cubitorum.* Haec uerba SCALIGER in animaduersionibus suis in THEOPHR. ERESIVM ita explicauit: *Nos saluo meliore iudicio, arborem THEOPHRASTI delineari putamus, quam Areccam Indi, et Arabes Faufel, uocant.* In recentioribus autem scriptis, uti in *Horto Malabarico*, in quo icones arboris integrae, una cum floribus fructibusue, egregie exprimuntur, *Palmae* classi etiam haec arbor annumeratur, et nomine *Caunga* designatur. PLUKENETVS *u*) totam arborem, *Puvvakighaham Zeylanensium* uocat, et in illo recentissimo de plantis Zeylanensibus scripto, a doctissimo et in scientia Botanica tam egregie uersato DOM. D. BURMANNO, sub titulo *Thesauri Zeylan.* *vv*) edito, uocatur haec palma *Arek Puvvak*, et *Arecei Puvvakuala*.

§. VII.

1) *Hist. Plant.* pag. 347. *u*) *Almagest. Botan.* Tom. I, pag. 235.
vv) pag. 32.

§. VII.

Proximum nunc est', ut de his dicam, quae arborem constituunt, et quae ad substantiam figuramque eius pertinent. Quia autem hocce *Palmae* genus nostris regionibus plane incognitum est, cum tamen aliis generibus *Palmarum* diuersi horti Magnatum et Academiarum hodie exornentur: igitur operae pretium duco, illos auctores in auxilium uocare, qui ipsi regiones Orientis perlustrarunt, ut eo melius ex horum scriptis arborem describere possim. Quod ad notam eius Characteristicam attinet, arborem hanc IOH. RAIUS x) ad classem arborum caudice simplici, non ramoso, gaudentium, refert. Neque aliter, secundum CAROLI CLVSII y) et aliorum auctorum descriptionem, haec arbor sese habet; cum dicant, *eam in magnitudinem eximiam assurgere, truncum eius aequali propemodum ubique crassitudine esse, spithamae unius crassitie, maxima crassitie ad radicem, in summitate paulo minori cortice obductum uiridi, claro, adeoque laeui, ut nullum adscensum praebeat, nisi adaptatis ad pedes laqueis, aut uinculis, cincto per intervalla caudice fune, ex sparto, aliaue materia, confecto.* Qua de causa ad fructus colligendos quoddam genus hominum, quos scanfores uocant, requiritur, qui etiam, sicut ENGELBERT. KAEMPFERVS z) uult, ad collectionem Dactylorum, nucumque Cocos, utiliter adhibentur. Radice autem *Palma Areccifera* gaudet, secundum descriptionem Horti Malabarici, a) *nigricante, oblonga crassitie unius Spithamae radículas albicantes et rufas, quae intus lignoso filamento sunt, ex se diffundente.* Ex caudicis uero superiori parte ordine decussato bini et bini rami deinde mutuo emergunt; qui non deorsum, uti in aliis *Palmae* speciebus, se inclinant; sed, sicuti CAROLVS CLVSIVS b) ex uerbis

Caudex;
Radix, Ra-
mique Pal-
mae Arecci-
ferae de-
scribuntur.

x) *Histor. plantar.* pag. 1363. y) in GARZ. AB HORTO Libr. I. *Arom.* pag. m. 188. z) *Amoenit. exotic.* fasc. IV. p. 710. a) Part. I. pag. 9. b) *Libr. I. arom.* pag. 188.

FABRICII loquitur, potius sursum uergunt, et tum demum inflectuntur; ac quia ab exterioribus interiores rami circumdantur, Caput quasi oblongum in summitate arboris constituunt, ut ab hominibus procul intuentibus orbem conficere uideantur. Hi autem rami, et quidem exteriores, (sicuti iidem Horti Malabarici celeberrimi auctores annotarunt, et qui latius de horum Figura substantiaque egerunt, (pede fisso ac rupto, post successu sua tempora, decidunt.

§. VIII.

Capsae vagi-
niformes
Palmae arec-
ciferae de-
scribuntur.

Pergimus porro ex splendidissimo hocce opere, cui titulus *Hortus Malabaricus*, descriptionem ulteriorem arboris nostrae ostendere. Quia uero hic liber non in omnium manibus reperitur, neque quisquam alius ex auctoribus Botanicis hucusque tam clare distincteque Palmam hanc *Arecciferam* descripsit: itaque, ut et porro de hac satis claram notitiam accipiamus, ipsa uerba auctorum huius splendidissimi operis apponam, et, quae forsan addenda uidentur, aliunde addam. *In capitulo Caungae, aiunt, quod in summitate est intra pedes ramorum foliaceorum, uaginiformes capsae, in quibus fasciae ramorum ac surculorum cum floribus et fructibus includuntur, proueniunt, infra singulos una. Sunt autem hae capsae oblongae, quatuor plus minus spithamas aequantes, in una parte, qua pedi exteriori accumbunt, rotundae; in altera autem, qua pedem interiorem complectuntur, caui ambitus, superficie glabra et aequabili, ad summitatem in medio partis cauae stria lacunosa; in cuius tractu rumpunt sulcatae, colore exterius primum uiridi-diluto albicante et subflauescente, post cum aetate flauescences, interius coloris candidi: capsula exteriore accrescente ramus exterior, qui eam arte includit, uti detruditur; fasciae ramorum et surculorum, quae in capsis inclusae constant uno pede plano, quo caudicis summitati circumpositae, suntque in ramulis*

§. IX.

De floribus
et fructibus
Arecæ.

B 3

tes

c) Part. I. p. 10.

tes in medio pulpae humorem clarum ac multum, qui cum pulpa adstringentis saporis est, suntque tum dicti Tanni - Painà; deinde pulpa interiori magis aucta sunt, ac nullum humorem in medio continentes, suntque tum fructus dicti Schalémba Painà, cum aetate maiori pulpa magis et magis indurescit, nasciturque in medio in longitudine medulla albicans, diciturque, cum pulpa et medulla minus dura est, Aria - Décca, cum durior, Adecca; cum maxime dura est et cortex aureo-flavus, Palécca. Est autem pulpa forma primum ovali, habens cuspidem acutiorrem ad summitatem fructus: est uero pulpa, cum tenera et humida est, colore albicante subflavo, forma oblonga et angusta et ad summitatem cuspidata, dura, colore ex rufo rubescente, forma est minus oblonga ac crassior, ac magis ad conum accedens, cuius basis est in ima parte fructus. Pulpa, seu dura, seu mollis, cum Betel addito momento Calcis manditur, maxime autem mollis. Cortex pulpam circumdans corticula exteriori densiori et duriori, quae superficie plana et glabra est, ac primum albicans; deinde uiridis, post cum pulpa ac medulla dura est, aureo-flavi coloris obductus, intus constans carne primum tenera albicante, quae maiori quantitate est ad imam partem fructus, ac corticula exteriori decisa cum pulpa fructus in comestione Betel simul manditur. Cum fructus uetustior est, filamentis lignosis, quae primum coloris albicantis sunt, deinceps cum corticula exterior aureo-flava est, coloris quoque aureo-flavi seu crocei sunt, est pertextus, estque tum adeo arcte pulpae superficiei adhaerens, ut non facile deglubi possit: intra medullam albicantem, in basi fructus, in medio oculus rotundiolus albicans conspicitur, qui germen fructus est, surculum edens. Hunc oculum satis distincte conspiciere licet in nostra aenea tabula, sub litera C. in medio fructu notatum. Haec igitur sunt, quae Auctores Horti MALABAR. de Palma Areccifera annotarunt. Cum autem de purificatione fructuum Areccae ab inuolucro suo, aliisque sordibus, nec non de exsiccatione horum

horum fructuum, plane nullam mentionem fecerint, nunc ea adiiciam, quae ex ipso ore illorum, qui has terras permigrarunt, teneo, aliorumque Scriptorum narrationi conueniunt. Fructus igitur *Areccae* bene maturi, si non sponte decidunt, per scanfores, aut alio modo decerpuntur, in magnosque acervos colliguntur, et sub terra condiuntur, in qua tamdiu etiam inclusi permanere debent, usque dum exterius inuolucrum in putredinem abeat et delabatur. Quae adhuc fructibus adhaerent, haec peculiari ligneo instrumento abraduntur; tamdiu hoc opus etiam continuatur, donec fructus plane glabri euadunt, qui deinde radiis solaribus exponuntur, leniter exsiccantur, usuique asseruantur. Nonnulli uero tradunt, Indos hanc ob causam fructus *Areccae* sub terra condere solere, ut gustu euadant gratiores.

§. X.

Vbi autem Palmarum *Arecciferarum* patria sit, et quae in ipsa cultura earum attendenda sint, paucis nunc exponam. Ex prioribus iam dictis, ut puto, satis constat, solam Indiam Orientis harum *Palmarum arecciferarum* patriam esse, et quidem certas regiones huius Indiae prae aliis harum arborum copia abundare. GARZIAS ab HORTO f) enim ipse tradit, fructus *Areccas* quidem in quibusdam regionibus, ut GVZZARATTE et DECAN, sed minus frequenter, nasci; maxima autem in quantitate in MALABARIA et insula Zeilan. Quapropter ex his regionibus et insulis, aliae, ut MALDIVAEE insulae, quae his fructibus destituuntur, aluntur; multum etiam fructuum *Areccae* in ORMVZ, CMBAYAM, et alios locos, defertur. Optimi fructus proueniunt, secundum praedictos auctores, in MOMBAIM Insula. Caeterum uerum est, in nullis regionibus Indiae Orientis, *Palman Arecciferam* magis luxu-

De patria
et cultura
Palmae
Arecciferae.

f) Libro I. arom. ex edit. CAROL. CLVSII p. m. 104.

luxuriare , quam in iis ad mare positis. Quapropter idem auctor scribit: Arecciferam Palmam *maritima amare ; mediterranea uero contemnere*. SERAPIO g) quidem tradit , Arabiam prorsus non alere *Areccam* ; sed recte GARZIAS AB HORTO h) annotauit , hanc sententiam non intelligendam esse de tota Arabia ; sed saltem de mediterraneis Arabiae locis. Hac in re adhuc plures auctores cum GARZIA AB HORTO consentiunt ; quod etiam maritimi Arabiae loci, ut DOFAR et Xaël, si non in magna copia, attamen in exigua, *Palmas Arreciferas* gignant. Peculiarem uero incolae illarum regionum, ubi *Arecciferae Palmae* proueniunt, plantandi modum tenent. Ex quibus incolis praecipui Zeylanenses sunt, qui, teste ROBERTO KNOXS, i) talem propagandae sobolis harum Palmarum modum obseruant. Cum enim ex maturis decidentibus fructibus *Areccae* in terram sese recondentibus, sponte successu temporis nouae arbusculae e terra exsurgere soleant ; hae autem pleraeque, propter ingentem copiam aliarum prope se prouenientium stolonum, iterum pereant, aut, si etiam incrementum aliquod acquirant, steriles euadant, propter defectum nutrimenti : igitur, ne hisce ex terra propullulantibus cotyledonibus, primis in uis ab uicinis exsurgentibus stolonibus alimentum adimatur, eaeque hac de causa plane exstinguantur, tunc ubi cotyledones harum *Palmarum Arecciferarum* ad aliqualem magnitudinem peruenerunt, eximuntur e terra, ad aliquot etiam passus in alias terras feraces plantantur, ut radices suas liberius diffundere citiusque crescere ualeant. Si itaque talem ordinem incolae obseruant, aequali deinde trunco hae arbores in altitudinem exsurgunt, ut *Palmeta umbrosa*, his regionibus ualde familiaria, aemulentur. Si- que terra calida eaque arenosa gaudent, quinto a satione uel

trans-

g) Lit. r. Simpl. Cap. 345. h) *Libr. l. arom.* ex edit. CAROL. CLVSII p. m. 104.

i) Beschreibung der Insel Ceylon, p. 26. et seq.

transplantatione anno, aut septimo, fructus proferunt, manentque deinde ad trigessimum usque annum, uel ultra, uegetae, fructusque proferentes. Praeterlapsis autem his annis languescunt, et, si quod ut plurimum accidit, quinquagesimum annum superarint, semper fere pereunt. Vt autem in his praedictis Palmetis, possessores *Palmarum Arecciferarum* sciant, quae ex arboribus unicuique possessori propria sit, inde has denotare solent sigillo quodam, uel loco huius ad radices arboris lapidem, nota Characteristica possessoris signatum, intrudunt; uel aliis placet, alias arbores hisce adplantare, ex quibus cognoscere ualeant, ad quem haec uel illa *Palma Areccifera* pertineat.

§. XI.

Praemissa nunc descriptione arboris *arecciferae*, eiusque patriae, et aliarum rerum, quae circa hanc monenda erant, nunc agendum est de huius arboris fructu, qui est ea ipsa *Arecca*, de qua differere ingressus sum. Varias autem *Areccae* species auctores Botanici, et alii, describere solent, quarum uarietas tam a figura externa, internaue, quam etiam a colore, saporeque, dependet. Quod si autem diuersitatem horum fructuum accuratius inspiciamus, patriam ad eam plurimum conferre puto. Quemadmodum enim nostris etiam in regionibus saepissime accidit, si e. gr. pyrorum, malorum, prunorumue arbores, ab hoc loco in alium locum, cui alia terrae qualitas, aliusque aër, situsque est, ut eae ut plurimum fructus prioribus aut succulentiores, aut graciliores, maiores aut minores, proferre soleant: ita eadem mihi conditio uidetur *Palmae arecciferae* esse. Cuius quamuis unica saltem species designetur ab auctoribus; magna tamen eius fructuum uarietas apud plurimos auctores deprehenditur. Ob hanc causam audeo affirmare, uarietatem illorum fructuum saltem a patriae, situsque, conditione dependere. Quam meam sententiam corroborare uidetur

De variis
Speciebus
fructuum
Areccae.

NIVS *k*), qui quatuor species fructuum *Areccae* recenset, eorumque uarietatem maxime a patria deducit : *Alius fructus est, inquit, uno latere pressior, altero latere latior. Alius minus nigricantior; quod genus Checaninum uocant, et in regione Cochinchinae prodest, sapore in masticatione ligneo; humectat nihilominus os, et rubore ac nigredine inficit, ut uelut cruore maderare uideatur. Alius est, a cuius masticatione homo, ut ebrius, in uertiginem rapitur. Quod autem malum, iuxta plurimorum auctorum sententiam, immaturo fructui adscribendum est; cito enim perit. Est etiam candidus fructus, quem insula Zeylan abunde profert. Adhuc apud alios auctores, plures species *Areccae* depinguntur, et describuntur, qui fructus minime autem ad classem fructuum *Areccae* pertinent, sed melius ad auellandarum Indicarum familiam referuntur. Nos hic nullam aliam speciem intelligimus, quam illam, quae non solum cum hodiernorum, sed et Arabum auctorum, inprimis SERAPIONIS, descriptione conuenit. Quem fructum DOMINICVS CHABRAEVS, *l*) dum uerba ISAACI EBEN AMRAM illustrare cupit, ita describit : *Fausel* esse fructum, magnitudine, colore, *Nucis moschatae* similem, rugosum, saporis amaricantis. Haec uero omnia cum nostra *Arecca* conuenire, ex descriptione huius fructus a nobis data patet. Qui autem plura de diuisionibus fructuum *Areccae* cognoscere cupit, cum in nigros, rufos, cinereos, et hi iterum in sessiles et turbinate, diuidantur; illi IOH. BAVHINVS *m*) facile satisfaciet.*

§. XII.

Quis usus Radicum, Ligni, et Ramorum, Palmae Arecciferae?

Quia autem non soli fructus *Palmae arecciferae* ab ipsis Indis magni aestimantur; sed et alia ex ista arbore horum usui inferuiunt, magnique commodi sunt; igitur necesse esse putauimus, ea non praeterire, harumque rerum usum, tam medicum,

k) *Histor. Plantar. L. II. punct. 11.* *l*) *Sciagraphia et Icon. Stirp. p. 29.*

m) *Hist. Plant. Libr. III. pag. 390.*

cum,quam mechanicum,in ordine exhibere. Radices itaque *Palmarum arecciferarum* decoctae,perhibentibus auctoribus HORTI MALABARICI, mederi dicuntur ori sulcato; et, si cum hoc decocto labia irrigentur, et os bene saepius diluatur, feruntur pustulas in his contentas egregie remouere. Lignum *Areccae* ad uarias res non exiguum praebet usum: nam ex hoc ligno, quod uariis striis exornatum est, uaria instrumenta mechanica, ut baculi, patellae, nec non disci conficiuntur. Ex illo autem ligno non striato, sicuti saepius iam citatus ROBERTVS KNOKS testatur, asseres scinduntur, et reliquum de ligno, quod durioris substantiae est, ad aedificia struenda utiliter adhibetur. CHRISTOPHORVS A COSTA *n*) tradit, quod Indi sciant ex hac arbore uirgas parare, ad crocodilos uenandos; quem modum uenandi ita describit: *Cum autem fragilis, inquit, et fungosa sit arboris huius materia, frangitur difficulter; idcirco uirga duorum digitorum crassitudine ex hac arbore parata crocodilum, cum in aqua, tum in terra, facile retinere potest; si per eius fauces transmittatur, (hac ratione enim illos uenari solent, ut saepius conspexi.)* Non autem solum lignum et radices, sed et emergentes ex capitulo Palmae arecciferae, uaginiformes capsae, quibus fasciae ramorum ac surculorum cum floribus ac fructibus includuntur, quarumque figuram, texturamque §.VIII satis clare exhibuimus, Indis in peregrinationibus magno commodo sunt; quippe his propter figuram concauam texturamue satis densam et coriaceam, marsupiorum loco, utuntur; in quibus, perhibente eodem ROBERTO KNOKS, non solum carnes asseruare solent, ne tam facile ex ingenti istius climatis calore in putredinem abeant: sed etiam in his notabilem copiam fluidorum, ut olei, et aquae, secum uehere possunt. Iis autem Indis alias uagabundis dictis, semperque in locis incultis, aut maxima ex parte in desertis, uiuentibus, quibus ut-

plurimum curta supellex , iis dico , inseruiunt hae capsae uaginiformes , patinarum loco , ex quibus *oryzam* in pultis formam redactam , ut quotidianum fere uictum , comedere solent. Ramis denique *Palmae arecciferae* propter elegantem eumque uiridem colorem , flexibilitatemque , annotante IOH. HVBNERO o) , Indi , exornare solent portas aedificiorum suorum , in quibus solennia celebrantur , utiliterque iidem rami in hortis adhibentur ad puluinos tegendos , ne plantae in his contentae a radiis solaribus comburantur. Ex hisce autem ramis , qui adhuc teneri sunt , succum exprimunt , quem cum oleo quodam , cui *Schirgelim* nomen , (Indis in uariis morbis tollendis ualde familiari) miscent , mixtumque hoc interne sumptum , secundum clarissimorum auctorum Horti MALABARICI p) narrationem , multum conferre dicitur ad lumbricos necandos. De inuolucro fructuum *Arecae* ualde uilloso , filamentisque lignosis obsito , testatur , CHRISTOPH. A COSTA q) , quod hoc ualde idoneum Indis sit , ad dentes repurgandos.

§. XIII.

Praecipuus
usus *Arecae*
apud Indos
consistit in
quotidiana
masticatione.

Quod denique ad ipsorum fructuum *Arecae* usum pertinet ; scimus ex plurimis auctoribus , inprimis ex iis , qui regiones Indiae Orientis permigrarunt , masticationem horum fructuum Indis adeo familiarem esse , ut sine hac se non uiuere posse , pro certo sibi persuadeant. Notum autem est , ex aliis scriptis , plerasque gentes , tam orientis , quam occidentis , uariis rebus masticandis , aut in ore retinendis , peruerse adsuescieri. *Peruuiiae* enim plerique incolae , tradente NICOLAO MONARDE , r) folium quoddam *Cocca* dictum , *Myrti* folio haud absimile , ita solent usurpare , ut illud aut solum , aut Calcis tantillo mixtum , aut contusum , folioque *Peti Peruuiani* commixtum , aut cum calce liquida in orbiculos uel pla-

o) *Kunst und Handlungs - Lexicon* pag. 141. p) Part. I. pag. 10. q) *Libr. I. arom.* p. 261. r) *Libr. III. Simpl. medicament.* pag. m. 435.

placentulas redactum, per totum diem, siue domi, siue alibi uersentur, in ore teneant et mastigent. Nihil iam dicam de *Peruuiae* incolis; Persae eandem consuetudinem amant, dum quotidie famigeratissimam confectionem *Bangue* assumunt, ad cibi uenerisque appetentiam sibi excitandam. Nec ab hoc more excludere possumus Turcas, si saltem creberrimum horum usum *Maslachi* considerare uelimus; quo puluere uini loco utuntur, conueniente uehiculo, uel condito quodam, si hilares esse uolunt; et ad animum excitandum, si pugnam ineunt. Aegyptii etiam hic non omittendi sunt; qui, quamquam *Maslacho* non abutuntur, attamen *Allium* maxime amant, ita, ut illud nullo non tempore mandant, et secum portent; cum sibi persuasum habeant, se *Allii* usu a plerisque morbis immunes fore. Adhaec plurium gentium huiusmodi exempla proferre possem, si id quidem nunc agerem. Neque uero necesse habemus, harum gentium malos huius generis mores mirari; cum etiam inter Europaeos similes consuetudines animaduertamus. Vnicam fumationem *Tabaci* pro exemplo adducere sufficiat; quae iam in uniuersa Europa in tantam consuetudinem abiit, ut non solum lautioris conditionis homines, sed et pauperrimi, quotidie fere hoc fumo utantur, et quidam ex iis, (ut ii ad littora maris habitantes, uel in mari nauigantes,) saepius inueniantur, qui sine hoc fumo uiuere se miseros existiment. Taceo illorum peruersam consuetudinem, Indorum more peiorem, qui ita *Tabaco* delectantur, ut his fumus non sufficiat, sed et hanc herbam mastigare soleant. Quid mirum itaque, si Indi, praesertim *Nigritae* inter *Tropicos* habitantes, sibi masticationem *Arecae* elegerint, qua sanitatem tueri, seque a uariis morbis praeseruare, credunt. Aspectus quidem hominum *Areccam* mastigantium, teste IACOB. BONTIO s) ualde squalidus est, ut iis, qui rationem huius rubicundi ex ore manantis liquoris ne-

C 3 sciunt,

s) *Tractat. de Medisina Indor. Cap. XVIII p. 23.*

sciunt, haemoptysi laborantes uideantur. Hinc merito huc pertinent illi uersiculi, quos IOH. DAHLE ^t) descripsit:

*Qui foliis credat commixta calce tenellis
Cum fructu hos Indos uesci, unde ore cruento
Purpureum eiiciunt succum, tam dentibus atris
Horrendum attingunt, et dentibus ore minantur?*

Haec porro continua cruenta manatio ex ore Indorum, apud Sinenfes in prouerbium usque degenerauit; quod IOHANNES NIEVHOF ^u) sequentibus uerbis posteritati reliquit: *Dit is een van de drie dingen die de Sinezen voor een Spreckvvoort van t' Landschap Quantung gebruiken, te vveten, dat er drie ongevvooone dingen, in dit Landschap zijn. De Hemel zonde Sneeuw, de Boomen altijt groen, en d' invvanders aetiit Bloet Spuvvend.* Quamuis Europaeis ipsis confitentibus, haec masticatio, et rubicundus liquor ex Indorum ore continue promanans, tantum non terribilis squalidus sit adspectu: at tamen omnia haec aduenas Europaeos non deterrent ab usu *Arecae*, sed potius, si per aliquot annos Indiae regiones incolunt, non minus ipsi, quam Indi, hac lue inficiuntur, eaque masticatione ita delectantur, ut regressi in Europam, ibi adhuc hanc consuetudinem exercere cupiant. Ipsemet noui in Belgio matronam, quae cum per aliquot annos in India Orientis uixisset, sibi quam maxime *Arecae* praeparatae usum familiarem reddiderat, et quidem ita, ut cum illa in patriam reuerfa esset, et *Amstelodami* marito nupta familiam constituisset, ne quidem per diem sine masticatione *Arecae* esse potuerit, et intermissa aliquando hac masticatione, uariis incomodis corporis cruciaretur; quae nullo alio remedio citius profligabantur, quam sola adhibita ista masticatione *Arecae*. Eadem fere IOH. BAVHINVS ^{vv}) refert, et quidem praecipue de Lusita-

^t) Pharmacolog. Part. II. pag. 349. ^u) Naukeurige Beschruving von Sina. pag. m. 141. ^{vv}) Histor. Plantar. Libr. III. pag. 391.

Lusitanis in India, quos hoc cibo ita assuetos esse narrat, ut sine Arecca atque Betele uiuere sibi, ἀδύνατον ducant; et mares perinde ac foeminae, tota die, imo etiam noctu, Areccam mandant, cum alias dormire nequeant.

§. XIV.

Modus autem *Areccam* praeparandi, eamque mastigandi, uariis existit. Mastigatur haec siue sola, siue aliis rebus commixta, siue recens, siue exsiccata. Si recens mastigatur, frangi facile potest; sin autem exsiccata; difficilius frangitur. Igitur peculiari instrumento, forcici haud absimili, ad scindendum hunc fructum, Indi utuntur: quod instrumentum, peculiaris structurae causa, IN HISTORIA ACADEMIAE REGIAE Parisiensis Scientiarum x) ita describitur. *Lors qu'on le present entier, on sert en meme temps un instrument propre a le couper, qui est une espece de ciseau, composé de deux branches mobiles, arretées par une de leur extremité, et qui s'ouvre de l'autre. C'est par l'extremité par laquelle de ciseau s'ouvre, que l'on presse l'Areca que l'on met entre ces deux branches pour le couper en tant de parties, que l'on veut: Et de ces deux branches il n'y en a qu'une qui est la supérieure destinée a couper, l'inférieure ne sert que d'appui pour soutenir cette semence dans le temps de l'effort, que l'on fait par l'abaissement de la partie supérieure de ciseau.* Si quando igitur *Arecae* fructus hoc instrumento in frustula redactus est, sumunt Indi (perhibentibus KAEMPFERO, DAPPERO, NIEVHOFIO, LINSCHOTTO, aliisque) *Betel* folium, ex quo prius neruos, folium percurrentes, unguibus digitorum eximunt; inungunt demum folii huius ita parati interiorem superficiem particula calcis liquida ex combustis ostreis conchisque parata, scrupulum fere dimidium pendente; et huic folio deinde frustula ab unico fructu *Arecca* inuoluunt.

Omni-

Omnibus his bene conuolutis et clausis, ne quid excidat; bolus hic ore sumitur masticaturque. Tunc primum succum, quem ille bolus elicit, quia ualde acris est, dentesque facile arrodit, exspuunt; alterum uero post longiorem masticationem deglutiunt. Alii ex Indis solum folium *Betel* in ore per breue temporis spatium tenent, et mandunt: ad demulcendum autem huius amaricantem saporem, tandem aliquot frustula *Areccae* adiiciunt. Alii, perhibente ENGELBERTO KAEMPFERO, y) egregio illo scrutatore Indicarum consuetudinum, ex penuria foliorum *Betel*; folia *Menthae* substituunt; quae foliorum *Betel* saporem prae aliis aemulantur. Quidam etiam reperiuntur, qui *Areccam* cum fructu quodam Indiae Orientis, qui gentibus illis *Syryboa*, uel etiam a quibusdam auctoribus *Siugboa*, uel *Zeriboa*, uocatur, mandunt; aut, deficiente hoc, *Caryophyllos*, *Cardamomum*, nec non *Cinamomum*, substituunt. Ditiores in India, prout LINSCHOTTUS z) refert, parant ex *Cate*, *Camphora*, *Ligno Aloes* et *Ambra*, pillulas, quas folio *Betel*, prius Calcis tantillo inuncto, (quibus omnibus, etiam tria quatuorue frustula *Areccae* adiiciunt,) inuoluunt, et ita mandunt.

§. XV.

De Confectione et aestimatione *Areccae*.

Illa nunc mixtio, quae ex *Arecca*, folio *Betel*, et calce uiua, siue sub trochulorum siue boli forma, componitur, dici solet *confectio Arecca*, uel *Betel Arecca*; atque haec tam frequenter usurpatur ab omni genere hominum in India uiuentium, ut aliquando in hanc ipsam confectionem incredibiles sumtus impendantur. Hinc MVNDIVS, a) minus mireris, inquit, *impensas Mizumae regis*, Balagatae, qui fertur in hoc pharmacum singulis annis trigesies mille aureos Lusitanicos impendisse. Imo ENGELBERTUS KAEMPFERUS testatur, hanc confectionem in regno *Siamensi*, nec non *Malabarico*, tanti pretii

y) *Amoenitat. Exotic. fascicul. III. p. 649.* z) *Voyage ende Schipaert. Cap. 60. p. m. 84.* a) *BIOXPHEToLog. p. 336.*

pretii esse , ut pro singulari gratia habeatur , cui a Maiestate *Betelum* dono porrigatur. Pergit idem auctor: *In aulis Malabaricis uidi , non procul a principe stare , qui subinde nouam Betelem porrigeret ; non digitis , sed furca tenui , argento obducta , et trochorum apparatu in longam seriem adornata ; exhibendi hic ritus ad aulae magnificentiam spectabat. In Siamesi curia obtinet , ut illis , qui Regi a consilio sunt , (Opra eos uocant) Betelum receptaculum praeferatur , quo a Maiestate donari solent , artificiose ex auro , uel argento , uel metallo sequiori , pro cuiuscunque dignitate fabricato. Sine hoc adepto nobilitatis insigni comparere in Regia uel illustrium conuiuio , non audeat. Theca illa adornatur capsella plena calcis ad unguenti consistentiam paratae ; spatula ad tractandam calcem facta ; forfice singularis structurae , qua *Arecca* findi potest ; et loculis ad recipiendum folia , nuces , et ex his composita uolumina , siue trochulos. Etiam ab aliis populis , *Persis* , *Bensanis* , *Gentivis* , teste SCHVLZIO b) , ita copiose assumitur haec confectio , ut in omnibus illorum conuiujs ultimum locum , inter fercula haec confectio *Arecae* obtineat ; hanc quidem ob causam , quia credunt , concoctionem eo melius hac promoueri. A plebe Indorum non minus frequenter haec confectio usurpatur , ita , ut , si amicis , uel aliis , aliqualia officia humanitatis praestare cupiunt , sibi inuicem in plateis obuenientibus *Areccam* hanc praeparatam offerant. Imo in hac confectioe apparanda et componenda toto die Indorum mulierculae occupatae sunt : eademque publice in plateis uenum prostat , qua utuntur ut plurimum peregrinantes. Quin et , si Indi se inuicem uisitant , summa beneuolentiae significatione , hospitibus et familiaribus , ab hero *Arecca* , in lignea , uel apud ditiores , in aurea , siue argentea , patina , una cum folio *Betel* , et calce uiua , offertur , et (sicuti *Acta Medico-Phy-**

D

fica

sic c) huius rei mentionem faciunt,) uasa quaedam peculiaria, ex terra Porcellanica confecta, et ad excipiendam saliuam destinata, in quas ollulas saliuarias scite apteque, tanquam per syringem, saliuam eiaculari sciunt, simul apponuntur; quae etiam Belgis in frequenti usu sunt, et ab his *Quispedoors* uocantur. Sicuti fumo tabaci uiri, ita Indorum mulierculae hac masticatione ualde delectantur, et plurimum temporis consumere solent.

§. XVI.

Indi certis
temporibus
abstinent a
Confectione
Arecae, pro-
pter folium
Betel.

Quamuis autem confectionis *Arecae* masticatio apud Indos per totum diem fere duret; attamen iis etiam quibusdam temporibus prohibitum est, ea ipsa confectione uti, *Betel* folii causa. Quamobrem huic folio substituunt uaria aromata, eaque, hisce prohibitis temporibus, ut in funeribus amicorum, uel sanguine iunctorum, et in quibusdam ieiunio destinatis diebus, sola cum *Arecca* mixta mandunt. IOHANN. BAVHINVS, d) ex uerbis ALOYSII CADAMVSTI, refert, *de incolis urbis Calecut, quod hi ob funera praecipue pullam induant uestem, in speciem moestitiae, temperareque sibi soleant a folio huiusmodi Betel, ut et dentes prae se ferant moerorem: subrufo enim colori succedere nigricantem.* Sed recte hic Celeberrimus IOH. BAVHINVS eodem loco reprehendit CADAMVSTVM, quod minime nigror hic dentium a *Betel* folio, sed magis a nucibus *Arecae*, Calcisque particulis acrioribus alcalinis, dependeat. GARZIAS a HORTO e) de *Mauritanis* dicit, *eos publici ieiunii tempore, cum a folio BETEL abstineant, solam Areccam mandere, uel purgandi uentriculi cerebrique gratia eam cum Cardamomo masticare solere.*

§. XVIII.

Agitur de
folio *Betel*
et fructu
Syri Boa.

Cum uero iam passim mentionem iniecerim uocis *Betel*, qua planta una cum *Arecca* Indi utuntur: nunc admoneor, quia,

e) Volum. I. in append. p. 16. d) *Histor. Plant. L. III. p. 437.* e) *Libr. I. arom. ex edit. CAROL. CLVS. p. 104.*

sicuti haec , acuminata ; diluto colore uiridi praedita , glabra , et splendentia. Haec autem ipsa folia , sicut NIEVHOFIVS annotauit , et res sese ita habet , percurrunt quinque uel sex nerui , quorum quidam rectilineo , alii circulari , cursu tendunt. Saporis sunt aromatici , amaritudine quadam mixti ; et in masticatione , uidetur masticantibus aliquid arenosi sub dentibus esse. Perhibent etiam quidam auctores , hanc plantam gignere solere foetum , piperis figurae accedentem , quem inprimis praedictus NIEVHOFIVS l) ita describit: *De Vrucht , die aan dat Gevvas groeit , en enig gelijkenis met de vvitte en langachtige Peper of met en Muize - Staert heft , vverd van d' Indianern Sirij - Boa genoemd.* Sed etiam de hac sententia auctores certant , utrum planta *Betel* fructum proferat , annon? ANGVILLARA et LINSCHOTTVS negant plane , hanc plantam gignere fructum ; sed eam figuram contortam , *piperis* similem , excrescentiam in superiore parte foliorum *Betel* , uel folium contortum saltem esse. Etsi etiam adhuc quidam sunt , qui concedant , *Betel* proferre fructum , licet rarissime ; attamen in hac re dissentiunt , et non nulli quidem recte statuunt , *Betel* , et *Syrj Boa* , non eundem esse fructum ; sed alium esse fructum *Syrj - Boa* , alium fructum *Betel*. Quod VVALTHERVS m) , nec non SOCIETAS REGIA LONDINENSIVM n) affirmare student , his uerbis : *Il y a une autre sorte de fruit , qui les Indiens Siug - Boa appelle , qu'on mèle avec l'Areica , au lieu du Betel , et qu'on peut seicher et transporter aussi bien que l'Areica , qui a la meme vertu , mais qui est de beaucoup plus agreable au palais.* Ipsemet non possum non recedere ab illorum sententia , qui tradunt , *Betel* idem esse , quod *Syrj Boa* ; cum quam maxima differentia inter hos duos fructus reperiatur. Fructus enim *Syrj Boa* , quem ex liberalitate celeberrimi Domini ALBERTI SE-

BAE

l) Naukeurige Beschruuing von Sina. p. 14. m) Descript. Ind. Or. p. 107.

n) Histoire p. 202.

BAE possideo, fere cum hoc fructu, qui in *Actis Physic. med.* describitur, sub titulo fructus *Betel*, conuenit. Siquidem ille octo pollicum instar longus est, exterius subfusci coloris, crassitie digiti minoris, magis siliquam ab utraque parte alatum, pendulam, repraesentans, quam *Piperis* fructum: externe rugis uariis obsitus est; pediculus, cui siliqua adhaeret, articulatus est; interne autem fructus hic plus, quam sexagintis loculamentis, gaudet, in quibus singulis recondita sunt semina triangularia, inferius concava, superius conuexa, fusci splendentisque coloris, ac saporis aromatici mucilaginosi, paululum aromatici. Figura fructus *Syri Boæ* melius ex tabula aenea sub littera E. F. G. patebit. Et haec sunt, quae etiam de planta *Betel*, eiusque fructus differentia cum fructu *Syri Boæ*, adiicere uolui.

§. XVIII.

Sed ut regrediamur in uiam, iam uidebimus, cur, et in quibus morbis Indi fructibus *Arecae* uti soleant? imprimis uero ii ad halitum suaueolentem conciliandum fructibus confectiōneque *Arecae* utuntur. Praeterea etiam egent tali remedio uel pharmaco, quia non pauci ex Indis, propter uictum crudum, nec non propter alia assumpta fortiter olentia, anima foetida laborant. Qua de causa etiam MEISTERVS o) annotauit, quod nēque Indorum, neque Lusitanorum in India uiuentium uirgines, uel mulierculae, mares osculo amplectantur, priusquam sibi hoc pharmaco suaueolentem conciliauerint halitum. Ita etiam uersantes in aëre contagioso, uel iam inter infectos, ora *Arecca* replere solent; sicuti nostrates tali tempore uariis Alexipharmacis, ut radicibus *Angelicae*, *Calami aromatici*, *baccisque Iuniperi*, utuntur. Egregie etiam haec confectio, nec non hi fructus, conueniunt iisdem gentibus, ad firmandos stabiliendosque

D. 3

dentes.

dentes. Quodsi autem hac confectione abutantur, uel legitimam quantitatem calcis in praeparanda confectione *Areccae* non obseruent, eique plus, quam decet, calcis adiiciant; tum, sicuti IACOB. BONTIVS, *p*) excellens ille in India *Archiater*, qui tam egregie Indorum morbos, medicaminaque morbis illis propulsandis idonea scrutatus est, obseruauit, hac confectione dentes magis arroduntur, tantumque abest, ut dentes inde stabiliantur; potius ut citius excidant. Hinc usu uenit, ut quidam ex Indis, qui nondum iuuentutis terminos sunt egressi, inueniantur dentibus carere; in quorum uacuos loculos ditiores aureos reponunt dentes; uel cavitates, ne quid ab assumptis cibis incidere nouosque dolores excitare possit, auri frustulis explent. Etsi uero succus extractus confectionis huius non solum totum os, sed et dentes, nigredine nificit; attamen Indi hunc nigrorem amant, et, perhibente HENRICO MVNDIO, *q*) credunt, magno decori esse, dentes nigricantes habere; inprimis adultis iam Indis turpe esse dentes albescere, dum dicunt, Europaeos cum canibus similiisque communes habere dentes albos. EHRENFREINDIVS HAGENDORNIVS *r*) narrat, foeminis Iaponensibus esse *Areccam* utilem, ad ruborem faciei conciliandum; igitur ab his pro *Cosmetico* haberi; sicuti nostrates foeminae, hac in re *Bezetti* utuntur, maresque defraudare solent. Nec infimum locum tenet haec confectio, uel fructus, *Areccae*, inter ea medicamenta, quae ad sanandum scorbutum, exulcerationem oris et gingiuarum, laudantur. Praedictus enim celeberrimus BONTIVS ipsemet eam *Areccam* inprimis utilem existimat, commendatque ad pituitam e capite eliciendam, et ad eam, quae in uentriculo est, consumendam, ne uaporibus caput impleatur, unde catarrhi aliaeque fluxiones nascantur; huiusque fructus moderatum usum idem auctor ualde fuadet,

p) Tract. de Medicin. Indor. Cap. XVIII. p. 23. *q*) BIOXPHETo log. p. 356.

r) Tract. de terra Catechu, Sect. VI, Cap. I, p. 78.

suadet, fumigiique usui tabaci longe antefert. Adhaec, sicuti ante iam monuimus, haec confectio Orientis populis egregium tonicum, uentriculumque roborans medicamentum praebere solet. Non solum autem fructus *Areccae*, ut pharmacum, Indis quamplurima commoda affert; sed praeterea: iis magnam utilitatem in arte tinctoria largitur, Indi enim sicut iam citatus MEISTERVS refert, in Insula COROMANDEL horum fructuum frequens habent commercium; quia ex his colorem purpureum extrahere callent; quo eleganti colore Lina Xylina inficiunt, quae deinde ubique hodiernis temporibus a foeminis ad pulcherrimos uestitus adhibentur, et, sub uulgari nomine ZCHITSE, in omnibus fere tabernis institorum uenales prostant.

§. XIX.

Ne uero quis cogitet, Indis, horumque medicis, unice ^{Quis usus fructus} usum fructuum *Areccae* cognitum familiaremque fuisse; ^{*Areccae* fuerit apud ueteres Arabes?} ex scriptis Arabum medicorum intelligimus, iampridem ueteres Arabes eos etiam sub nomine *Faufel* usui medico destinasse, uariisque compositionibus pharmaceuticis admiscuisse. Princeps ille *Arabum* medicus, AVICENNA, s) hos fructus, propter qualitates, et temperiem, quam frigidam siccamque in tertio gradu esse censuit, medicamentis infrigidatiuis, stypticisque, annumerauit; inde eosdem ad apostemata calida, et uehementes inflammationes oculorum sanandas, accommodatos esse tradidit. Propter particulas autem blandas easque excalescentes, uirtutem roborandi iisdem fructibus attribuit, quos hunc in sopum uariis pharmacis adiecit, ubi roborantibus leniterque adstringentibus opus est. Inter alia composita, quae praetereo, etiam ingrediebatur celebratissimam ab AVICENNA habitam confectioem *Scelithe*; quae illo tempore prae aliis medicaminibus fere in omnibus morbis plurimum praestare credebatur. Quam autem AVICENNAE
sen-

sententiam tantum non omnes fere Arabum medici secuti sunt ; sicuti haec IOH. BAVHIN. *t*) de SERAPIONE, MAHAZER, MESVE, aliisque, testatur ; utpote qui omnes *Fausel* fructus, frigidos siccosque in tertio gradu aestimarunt, horumque facultates, tam adstringendo, quam roborando, SANTIALI rubri qualitatibus quam maxime accedere, opinati sunt. GARZIAS ab HORTO *u*) autem uituperat eos, improbeque illos facere censet, qui pro *Fausel*, *Santalum* rubrum constituunt ; quia hoc *Santalum* plerumque alio ligno rubro adulteratur.

§. XX.

In quibus
morbis Eu-
ropaeorum
Medici fru-
ctibus Arec-
cae utantur ?

Sed uidebimus nunc, quid Europaeorum medici de fructu *Arecca* hucusque senserint. TABERNAMONTANVS, *vv*) IOACH. CAMERARIVS, *x*) aliique, tradunt, fructum *Areccam* in biliosis alui profluuiis curandis, et in sistendis reiectionibus sanguinis, uomitibusque cruentis, item et debili uentriculo roborando, mirificam uim et efficaciam exerere. In primis autem citatus iam CAMERARIVS *laudat* *Areccae fructus in uini sufficienti quantitate decoctos ; decoctumque hoc prius colatum, tepideque ore detentum, ad mitigandos dolores dentium et ad gingiuam stabiliendam multum facere, ait.* Quod decoctum, eodem auctore teste, utiliter adhibetur, si palpebrae oculorum, quae scabie sint infectae, quotidie illinantur ; aut si quaecunque oculorum inflammationes sint curandae. Nescio autem, quo fato fructuum *Areccae* usus tamdiu inde neglectus fuerit ? an ex penuria horum, an alia ex causa, determinare non possum. Etsi uero iidem fructus adhuc hodie quibusdam medicis quasi prorsus incogniti, aut certe ab omni usu remoti, et medicamentis abolitis, ac quasi ex officinis relegatis annumerati esse uideantur : sunt nihilominus nonnulli, qui magnis laudibus illorum fructuum effectum extol-

(*t*) Libr. III. p. 390. *u*) Libr. I. arom. ex edit. CAROL. CLVS. p. m. 102.
vv) Herbar. Oper. CASP. BAVH. p. 646. *x*) Herbar. p. 100.

tollunt. Quo nomine non possum non sigillatim praedicare celeberrimos illos peritissimosque MEDICOS VRATISLAVIENSES, quorum eximia in artem salutarem merita in luce et ore omnium uersantur. Hi *Historiae Vratisl.* y) Scriptum ali- quod inseruerunt, in quo describitur methodus curandi Dy- senteriam malignam, quae anno 1719. per Menses aestiuos partem Dioeceseos Magdeburgensis affligeret; ubi cum multa medicamina incassum hoc in morbo adhiberentur, inter alia remedia idonea ad morbum hunc profligandum, nominatim sequentibus uerbis *Arecca*, et eius confectio laudatur. *Etiam hic conspirat*, inquit Auctor huius scripti, *confectio illa Orientalium*, Betel *Arecca*, quae leuiter adstringendo tonum uentriculi roborat; hinc etiam illius usus et masticatio satis familiaris illis est. Et sane, si quid optandum foret, uellem, ut, quemadmodum Noces moschatae, ita quoque *Areccae nuces*, in officinis nostris prostarent: sine dubio enim in dysenteris a calore extraordina- rio in climate nostro causatis cum successu usurpari possent. Prostat quidem in officinis nostris compositum, terrae Catechu nomine, cuius ingrediens *Areccae nucum immaturus succus* reputatur; sed crederem, ipsas nucas maturas in substantia, quemadmodum in India Orientali ita in usum ueniunt, huic composito longe praeferendas esse. Insuper sciscitandum quoque foret in posterum, qualis Dysenteriae in ipsa India Orientali medendi esset methodus, quae etiam forte apud nos in circum- stantiis quibusdam in usum trahi posset. Huic sententiae ad- iungenda est ea commendatio usus *Areccae* in eodem morbo ex ACTIS PHYSIC. MED. z) in quibus *Arecca puluerisata* ad ℥j. uel 3℔. ex idoneo uehiculo sumta, in Dysenteris, ac Diarrhoeis, multum praestare dicitur. IOH. RAIUS a) illam

E non

y) Breslauer Kunst und Natur - Geschichte 9ter und 10ter Theil, pag. 456. z) Volum. I. in append. pag. 16. a) Histor. plant. pag. 1363.

non minus commendat ad auertendum ciborum fastidium, uentriculumque roborandum. Praeterea Celeberrimus TEICHMEYERVS, *b)* inter ea medicamenta, quae *Stomatica* uocantur, *Areccam* refert. Fuerunt quidam ex Medicis, qui *Arecae Hypnoticam* uim adscripserunt; atque forsan inde uenit, ut quidam ex his plane ab huius fructus usu abhorruerint, eamque neglexerint. Sed si hanc rem accuratius inspiciamus, uis illa hypnotica minime *Arecae* illae, de qua nobis sermo est, adscribenda est; sed potius immaturae *Arecae*, sicuti iam annotauimus, quae, sicuti IAC. BONTIUS *c)* tradit, ab Indis *Mabok*, tanquam ebrium, uel *Pynang Mouda*, quasi iuuenem dicas, uocatur, *de cuius masticatione homines ebrii quasi a nimia portione uini rapiuntur, quod malum autem manso paulo salis cito euanescit.* MATTH. LOBELIUS *d)* ad hanc sententiam corroborandam exemplum narrat, de matrona generosa Angla, utero gerente, quae cum decem uel duodecim harum nucum, ita auide comederit, ebria fuisset reddita. Sed quis hic non uidet, abusum producere hoc malum potuisse; secundum tritum prouerbum: Omne nimium uertitur in uitium. Egregie etiam iam citatus BONTIUS *Areccam* defendit; abusum uero huius fructus, his uerbis uituperat: *Dementia summa est (inquit) ea pro alimento uelle habere, quae medicamentum tantum obtinent.* Imo experientissimus ELIAS CAMERARIUS *e)* egregie ita de abusu rerum differit: *Adeo misere comparatum est, cum homine ut, si quaeras, quatenam res fiant morborum causae, omnia in ipsius perniciem conspirare post lapsum, etiam illae, quae ipsius sanitatem conseruant, abusu et applicatione incongrua morborum euadere causas et occasiones.*

§. XXI.

b) Institut. mater. med. Sect. III. Cap. V. pag. 139. *c)* Medicin. Indor. Cap. XVIII. p. 23. *d)* Histor. Stirp. p. 641. *e)* System. Cautel. med. p. 165.

§. XXI.

Sed satis dixisse de uirtutibus *Areccae* mihi uideor, cum ea, quae tam in ueterum, quam recentiorum, scriptis deprehendi, iam de iis exposuerim. Nihil itaque superesse puto, quam ut et ea declaranda sumam, quae ex hisce fructibus praeparantur, usuique medico inseruiunt. Primum quidem productum ex hisce fructibus *Catagambra* uocatur. Sunt haec placentae quaedam, quae fere magis in officinis pharmacopolarum Belgarum, quam nostratum, reperiuntur; quia hac in regione magis a Medicis praescribuntur, et inprimis ab his laudantur, in febribus acutis, nec non ad pectus demulcendum; si cum aqua calida infundantur, locoque infusi *Theiformis* potentur. In quibus morbis Iaponiae incolae utuntur, latius clariusque ALBERTVS SEBA, quondam *Amstelodamensium* praestantissimus Pharmacopoeus, in *Actis Phys. med. f)* descripsit, unacum modo praeparandi has placentas *Catagambras*; qui modus ita se habet: *Hae placentae Catagamber, parantur de flore subtilissimo succi Cachou Iaponici, ait ille, quem, e foliis atque fructibus arborum Areck dictarum, extractum Iaponenses certa quadam terra argillacea pingui et molli, terrae Lemniae, uel Boli armenae simili, remiscunt, mistum ingentibus cupis aut dolis immittunt, et adfusa aqua tamdiu calori soli exponunt, donec massa fermentationem concipiat: qua nata, partes subtilissimae istius massae in superficie enatantes, instar cremoris lactis sese colligunt, et accurate dein separatae in modulos orbiculares infunduntur, ut aliquot dierum mora ibi spissescant. Tum uero placentae asseribus impositae exsiccantur, atque usui asseruantur, colore pariter ac magnitudine discrepantes. Externa earum superficies saturate flaua quasi crusta obducta est, intus dilutior est flauedo. Nescio autem, cur celeberrimus ille uir de sapore harum placentarum taceat;*

Ex fructibus
Areccae
praeparantur placentae *Catagamber dictae.*

E 2

cum

cum tamen ea obseruatio non praetereunda esse mihi uideatur. Ego quidem, cum eas placentas degustarem, deprehendi, has participes esse saporis paululum aromatici, aliqua tamen amaritiae mixti; cui accedit, si diutius ore detinentur, blanda facultas adstringens, quae papilulas linguae admodum stimulat, mox autem perit, gratusque sapor et odor succedit. Harum nunc placentarum uirtutes praedictus ALBERTVS SEBA satis non potest laudare. Saepius etiam uidi, his placentis illum in supra commemoratis morbis periculum facere; et semper fere optatissimum praestiterunt effectum, inprimis in eiusmodi subiectis, quibus iter per mare tales morbos produxerat.

§. XXII.

Succus Cachou, ex
Fructibus
Areccae
paratur.

Alterum productum ex fructibus *Areccae*, est ille succus concretus, in omnibus Pharmacopolarum sese officinis sub terrae *Iaponicae*, uel terrae *Catechu*, nomine, licet male, proflans. Quodsi uellem nunc omnes controuersias afferre, de quibus inter medicos multum iam olim concertatum est; an succus ille *Catechu*, *Lycium* ueterum sit; item, an uerus succus, an terra sit, aut an ex fructibus, *Areccae*, uel aliarum plantarum, uel arborum fructibus extractus sit hic succus, et quae sunt alia, certe actum agerem: quia haec dudum ab eruditissimis uiris exposita sunt quo nomine praecipue magnam laudem meruerunt, VVEDELIVS, AMMANNVS, HELVIGIVS, et HAGENDORNIVS, utpote qui ultimus tractatum peculiarem de terra sic dicta *Catechu* conscripsit, in quo prolixè satis de natura, temperamento, patria, medicamentisque, quae ab hoc concreto sperantur agit. Ne autem plane sicco pede hasce praedictas propositiones praeteream, quaedam saltem adnotare uolo. Quod *Lycium* ueterum sit hic succus *Catechu*, id defendit HERMANNVS; g) et fortasse ipse AVICEN-

NA

NA *b*) putauit, Lycium ex *Areccae* fructibus sumptum uel praeparatum esse; quia ipsemet suadet, ut loco Lycii *Fausel* substitui debeat, quia eandem cum *Lycio* uim exerat. Quod autem *Catechu* non terra sit, ex chymicis huius concreti examinibus elucet: id quod cum praedicto HAGENDORNIO *i*), BOVL DVCIVS *k*) erudite iam demonstraui. Quin ipsemet ex eius solutione, incineratione, aliisque cum hoc concreto institutis examinibus Chymicis, expertus sum, eam, false sic dictam terram *Catechu*, minime regni mineralis, sed potius uegetabilis, sobolem esse. Quod autem probandum mihi adhuc superest, id est, ut etiam monstrem, concretum hoc ex succo *Areccae* fructuum esse; nec obstat, quod alii ex ueteribus crediderunt, succum hunc concretum, ex peculiaris arboris *Cachou* uocatae fructibus praeparatum esse. Quod autem hoc non sit, non solum praedictus PAVLVVS AMMANVS *l*) iam cum aliis auctoribus monstraui, sed et plurimi ex recentioribus affirmant, basin huius concreti decoctum fructuum *Areccae* esse. Huic sententiae accedit illud recentissimum scriptum, a iam citato celeberrimo Domino ALBERT. SEBA Physico medic. Actis *m*) insertum. *Residuum hoc*, inquit, *illius massae defloratae* (Catagambrae nempe) *adhuc in cupa detentae, probe agitatum, per cribrum in aliud uas traicitur, relinquitur tum, donec factus sit particularum grauiorum infundum secessus, supernatans inde aqua decantatur, sedimentum in fundo exsiccatur, inque massulas rotundas aut quadratas coactum ulterius ad solem arefactum usui seruatur, sub nomine terrae Catechu.* Et haec idem auctor testatur, se referre, uti bona fide sibi relata fuerint a uiro quodam, qui diu in Iaponia sit commoratus. Hic modus praeparandi *Catechu* quidem simplicissimus sine ullo ingrediente est: attamen etiam alii sunt, qui dicant, huic inspissato succo *Areccae* solere

b) Libr. II. Cap. 399. *i*) in Tractatu de Catechu. *k*) Histoire de l'Academie de Science Anno 1709. *l*) Mannduct, ad Mater. Med. p. 9. *m*) Volum. IV. obs. 62.

Indos admiscere tantillum *Cort. Tsjannae et Spinae aegyptiacae nigrae* recent. uirid. contus. secundum MISCELLAN. NATVR. CVRIOS. *n*) uel Glyzyrrhizae Indicae et Calami arom. Indici, secundum PAVLI AMMANNI sententiam, ut eo melius *Catechu* fiat. Has duas sententias, et ego negare nolo, quia aliquid eiusmodi subdulcis et aromatici saporis, in soluto succo *Catechu* reperitur; attamen primarium locum in huius concreti praeparatione obtinet succus, uel decoctum, fructuum *Arecae*. Cum uero etiam multum fabuli, terrae, aliarumque rerum, remaneat in solutione huius succi *Catechu*; inde bene annotauit hoc iam iam commemoratum Scriptum *Miscell. Nat. Cur.* insertum, quod, quia Indorum nationes pleraeque fraudulentae sint, fieri saepius soleat, ut lucri causa ad pondus augendum succi *Catechu*, multum arenae, argillae, admisceant, utique sic sub nomine *Khaath*, *Cate*, uel *Catechu*, uenditent, distribuantque.

§. XXIII.

De Praeparatione
Siri-Gattae.
Gabrae.

Celeberrimus RAIVS *o*), qui in arte medica, praecipue autem scientia Botanica, excelluit, cuiusdam alius praeparati ex fructibus *Arecae* meminit, quod praeparatum nomen *Siri-gatta-Gambar* apud Indos habet; hocque nihil aliud est, quam succus concretus fructuum *Arecae*, cui admiscant, saporis odorisque suavis causa, *Caphuram*, et quidem de *Baros*, item *Lignum Aloës* et *Ambram*; mixtumque in pastillos, uel trochiscos, uel tabulas, redigunt. Quo Pharmaco, sicuti modo commemoratus auctor refert, ditiores potentioresque saltem Indiae uti solent. Videor mihi non errare, si hoc praeparatum idem esse existimem, quod a Gallis *Cachou purifié* dicitur; cum eius praeparatio in *historia Academiae Scientiar. Parisiens.* *p*) descripta, fere priori conueniat; nisi quod hi succo

succo *Catechu* purificato, praeter aromata et Ambram Sacchari tantillum adiici iubent. Illa autem *Siri-Gatta-Gambra*, quam ipsemet possideo, ab omni Saccharo admixto libera est, descripta et illi a *Raio*, plane conuenit. Largiter enim ambram commixtam habet, estque saporis adstringentis, odoris autem fragrantissimi, ut illi, qui hanc ore tenent, post tres quatuorue horas suauem odorem de se spargant. In eadem *Siri-Gatta Gambra* etiam uariant figurae, ita, ut quaedam, pillulaeformes, aliae rotundae, trochiscis similes, aliaeque in pastillos redactae, appareant. Illae autem, quae tabulas repraesentant, notatae sunt in una parte hieroglyphicis figuris, Characteribusque innumeris, haud secus ac uulgo sic dictum Atramentum Indicum notatum est.

§. XXIV.

Vltimam sedem inter praeparata ex *Arecae* fructibus occupat, *Essentia* Fructuum *Arecae*. Quae, quia nostris Pharmacopaeis fere incognita est, modum, sicuti a Celerissimo Domino ALB. SEBA, pharmacopoeo dexterrimo *Amstelodamensium*, praeparabatur, apponam. Recepit ille *Arecae* fructuum ℥iv. quos contundi iussit minutissime, quibus deinde immixtis cucurbitae uitreae, affudit liquoris Nitri fixi ℥ij. per diem noctemque loco quieto reposuit. Affuso demum Spiritus Vini rectificati ℥xvj. apposito alembico, eoque bene lutato, leni calore ignis abstraxit, liquoris ℥viij, quem denuo affudit, et indigestionis gradu per 8 dies reliquit; tunc filtrauit Tincturam atrorubente colore saturatam, usuique reposuit. Melior autem hic labor procedit, si Spiritus Vini per 3. uices supra calcem uiuam abstractus sumatur. Haec tinctura, propter blandas particulas adstringentes, meliori cum successu, quam ipsa illa, quae ex succo *Catechu* paratur, adhibetur, imprimis in omnibus fluxionibus sanguinis, nec non ad stomachum

chum debilem roborandum ; si eius 50 uel 60 guttae post prandium in uino assumantur. Quibus etiam placet matutino tempore hanc possunt in infuso *Theiformi*, uel potu *Coffée* tepido exhibere. Ex iisdem fructibus licet extractum quoddam parare, quod multis resinosis, nec non mucilaginosi particulis gaudet, quod etiam, tam quod ad saporem, quam ad colorem attinet, cum succo *Cachou* purificato, conuenit.

Et haec sunt, quae in praesenti Dissertatione proponenda duxi.

DUm moesti querimur tristissima funera Matris;
Fata Domus nostrae, Frater amande, leuas.
Cernimus, ecce, Tibi iam praemia grata parari;
Praemia, quae uirtus sedulitasque refert!
Ergo age, nunc solers Hygeae oracula pande;
Nunc animi cultas prome sagacis opes!
Sic Tibi, sic aegris, Indorum proffit Arecca!
Inualidis ueniat, Te ueniente, salus!

FRATRI CHARISSIMO
 gratulationis ergo
 dabat

IO. IACOBVS KIRSTEN,
 Medic. Doct. ac Physiol. et Chem.
 Prof. Publ.



